

## NUBENAN SÁNTA MARIAN KÁMALEN

### MA TUNA I GINASGÁS-MU

Ma tuna i ginasgás-mu, Maria, Bithren yan Nâna.  
Sa' nina'magof i Saina, nu i gef fina'tinás-mu.  
Hu tungo' i mina'gás-mu ya hu sen nâ'i hao pâ'go,  
I anti i minalago', yan todú i guinaha-hu.  
Yanggen hágu para guáhu, guáhu, Nâna, para hágu.  
Yanggen hágu para guáhu, guáhu, Nâna, para hágu.

### I SEÑÁT I SANTOS KILU'OS

Pot i señát i Santos Kilu'os na fanlibre ham gi enemigon-mâmi, Yu'os Sainan-mâmi. Gi na' an i Tata, yan i Lahi-ña yan i Espiritu Sânto. Táiguennaohon.

### FINA'TINAS SINETSOT

Ásaina Jesukristo, Rai na taiche' i mina'gás-mu, yan Yu'os na taihinekkok minaolek-mu, mina lak i Tata yan ininan i ginatbo-ña, i mina'huyong todú i guaha. Hues, i mina'fanlibre i taotao siha, taiche tan na Kinilu! Na Un sen guaiya i ginasgas, na Un na suha gi isao ayu i inayek-mu na nana-mu. Maestro nu i hu hongge, kalan i ti lalachi na minagâhet. Satbadot, annai mannanangga yu' kalan ti hihikok na mina'ase. Yu'os nu i hu gofli'e' kalan i sen takhilo' na minaolek nu i sen gofli'e'on!

Guahu, lâlao laoyu' yanggen hu atitutuyi na hu atotga yu' umisâgue hao. Hu tungo' i tailayen fina'tinas-hu, ya piniti yu' nu i hu isâgue hao. Cha'mo chumâchanda Ásaina, ini i mañotsot na i'isao nu i lumiheng gi papa i manton ayu i gasgas na Bithren. Nâ'i ennao i mandidok yan manle'an fanatan-mu ti manmañodda' nu i dídidí' na isao.

Ayo i sen guaguan na hága' nu i Un chuda' gi kilu'os annai Un sâgue' ham, ya Un na suha i sen santos na nanâ-mu gi ginedden i isao, na ma'asi'e' yu' minaolek-ku. Na gasgas nu ayu ha' i na'ma'ase' na anti-hu nu i minitong i isao, ya hu siña lumi'e' i ina paka' ennao i Un gofli'e' na Paluma. Ya guahu, metton i hinasso-ku. Ya hu na i hao finihó' nu i hinilat i korason-hu na piniti, na ti hu isâgue hao ta'lo yanggen Un na inayuda yu' nu i yini'usan na grasia-mu. Táiguennaohon.

### MATÁYUYOT I ESPIRITU SÁNTO

Nana'rnagof na Espiritu na ginen i Tata yan i Lahi-ña kalan taiche' na umaguaiyan-ñiha! Ina i hinasso-ku, songge i hinalom-hu, ya hu géftuna yan hu na takhelo' i sênma'gas na asaguá-mu, nanan Saina-hu as Jesukristo, si Santa Maria, hu nubenânayi yan hu hahasso i mesterión i tai'isao na mamapotge ñaihón-ña. Táiguennaohon.

### MATÁYUYOT SI SANTA MARIA

Sengasgas hao, Bithren Maria, na hágu ha' na maisa i guinaiya na hagan Yu'os Tata, sen nanan i Lahi-ña, sen má'gas na asaguan i Espiritu Sânto, lâlala' na sagan i Sinantusan Trinidad. Mandadaña ham gi me nâ-mu ya in na etnon i korason-mami yan i Korason-mu.

In tekukkune i dinangkulon Mina'gas-ña. In sâsangan i taiche' na Sinantos-ña, in nâ'i gue' nu i ginefli'en-mami. Ya i taddodong na respetu intitina gue' sa' nina libre hao gi finene na na isao. Ya nina bula hao grasia ayu annai mamapotge naihón hao. Manmalago' ham in gepte hao sen má'gas; ya

in gágagao hao na un na' taka' ham nu i magâhet na ginefli'en Yu'os yan ayu i sen sântos na pinto'-ña. Taíguennaohon.

## TINAITAI GI --- NA HA'ANI

Ma tutuhon gi i páhina 4 ...

## TINAITAI I IMAKULÁDA NA KONSEPSIÓN

O Yu'os nu i ginen i Imakuláda na Konsepsión i Bithren as Sânta Maria, un pripara un dikno na fansagáyan para i Lahi-mu. In gagagao Hao na put i gi mali'en i para i finatai i Lahi-mu, Un pattang gue' ginen todú nu i mancha, pues Hâgu lokkue' Un petmiti ham, mana'fangasgas ginen i tinayuyot-ña, na in fanmátto guatu giya Hâgu. Ginen i mismo Sainan-mami as Jesukristo, i Lahi-mu nu i lála'la' yan mangobiebietna yan Hâgu man hahamyó yan i Espiritu Santo, Un Yu'os para todú i manañhinekok na tiempo. Taíguennaohon.

## TRES NA NINENE

### FINE'NENA NA NINENE

Hu tuna hao, na Korason Sânta Maria, tunâyon na sahguan i sen guinaiya-ku as Jesukristo Yu'os Ostia. Ya magof yu' sa' hu li'e' hao na nina'bula as Yu'os Tâta nu i grasia siha ya nina'hagâ-ña, ya sengátbo gi sengasgas na mamapotge'ñaihohon-mu.

**Kânta:** Châhlao, nanan-mâmi, i âbe Maria, paopao na nina'en, i taotao-mu siha.

**Techa:** Si Yu'os un gineggue Maria, bula hao grâsia, si Yu'os u gaige giya hâgu; u ma tuna hao entre todú i famalao'an ya u ma tuna i finanñâgu-mu as Jesus.

**Todu:** Sânta Maria, Nânan Yu'os, tayuyuti ham nu i maní'isâo pâ'go yan i oran i finatai-mâmi. Âmen.

**Techa:** U ma tuna i Tata, yan i Lahi-ña, yan i Espiritu Sânto.

**Todu:** Taiguihi i tutuhon-ña, pâ'go yan siempre gi i manañhinekkok na ha'âni. Taíguennaohon.

### MINA'DOS NA NINENE

Hu tuna hao, na Korason Sânta Maria, tunâyon na sahguan i sen guinaiya-ku as Jesukristo Yu'os Ostia. Ya magof yu' sa' hu li'e' hao na nina'bula as Yu'os Lahi-ña nu i grasia siha ya nina'nanâ-ña, ya sengátbo gi sengasgas na mamapotge'ñaihohon-mu.

**Kânta:** Châhlao, nanan-mâmi, i âbe Maria, paopao na nina'en, i taotao-mu siha.

**Techa:** Si Yu'os un gineggue Maria, bula hao grâsia, si Yu'os u gaige giya hâgu; u ma tuna hao entre todú i famalao'an ya u ma tuna i finanñâgu-mu as Jesus.

**Todu:** Sânta Maria, Nânan Yu'os, tayuyuti ham nu i maní'isâo pâ'go yan i oran i finatai-mâmi. Âmen.

**Techa:** U ma tuna i Tata, yan i Lahi-ña, yan i Espiritu Sânto.

**Todu:** Taiguihi i tutuhon-ña, pâ'go yan siempre gi i manañhinekkok na ha'âni. Taíguennaohon.

## **MINA'TRES NA NINENE**

Hu tuna hao, na Korason Sânta Maria, tunâyon na sahguan i sen guinaiya-ku as Jesukristo Yu'os Ostia. Ya magof yu' sa hu li'e' hao na nina bula as Yu'os Espiritu Sânto nu i grasia siha ya fina'asaguâ-ña, ya sengâtbo gi sengasgas na mamapotge'ñaihon-mu.

**Kânta:** Châhlao, nanan-mâmi, i âbe Maria, paopao na nina'en, i taotao-mu siha.

**Techa:** Si Yu'os un gineggue Maria, bula hao grâsia, si Yu'os u gaige giya hâgu; u ma tuna hao entre todû i famalao'an ya u ma tuna i finanñâgu-mu as Jesus.

**Todu:** Sânta Maria, Nânan Yu'os, tayuyuti ham nu i maní'isâo pâ'go yan i oran i finatai-mâmi. Âmen.

**Techa:** U ma tuna i Tata, yan i Lahi-ña, yan i Espiritu Sânto.

**Todu:** Taiguihi i tutuhon-ña, pâ'go yan siempre gi i manaíhinekkok na ha'âni. Taíguennaohon.

## **TINAYUYOT**

Sengasgas hao, Bithren Maria, magâhet na nanan Jesús yan i Santa Iglesia, ya gi minagâhet yan mesteriôn i sengasgas na mamapotge'ñaihon-mu patronan ini na tâno . I sen na magof na mesteriôn i taiche'tan na mamapotge'ñaihon-mu minâ intatayuyot hao na un atan ham nu i yô'ase' na fanatan-mu. Ya in fanâ gofli'e' ham nu i famagu'on-mu nu i ti hihikok na ginefli'e'. In dadalalak an ha' manlâla'la' ham i manmatâgo -mâmi. Ya un hagu'i ham nu i in gagagao hao yan i grasian i u maolek finatai-mâmi. Taíguennaohon.

**Techa:** Âbe Maria Purisima, **Todu:** Sin pekâdo konsebida.

## **KÂNTAN FINAKPO': SENMASÂMAI HAO, ABOK-HU**

Senmasâmai hao, abok-hu, sântos hao gi tutuhon-mu.

Koru: In tina Sânta Maria, i mamapotge'ñaihon-mu.

Pinto' Yu'os I lahi-ña, mama'taotao yan patgon-mu,

Sa' hahentan giya hâgu, I binithren hinasso-mu.

Taihineplat, taichine'tan, yan sengasgas korason-mu.

Koru: In tina Sânta Maria, i mamapotge'ñaihon-mu.

Annai nina'gai ha'âne, as Yu'os i tataotao-mu,

ha ke'amut i aniti, i sinantos gi ha'of-mu.

Lao mayamak I ilu-ña, gi mamapotge'ñaihon-mu.

Koru: In tina Sânta Maria, i mamapotge'ñaihon-mu.

Nina'tungo' hao manana, as Yu'os go sanhalom-mu.

Na humahamyo yan guiya, kalan saina yan abok-mu.

Ayu nai bula hao grasia, ma'okte i minagof-mu.

Koru: In tina Sânta Maria, i mamapotge'ñaihon-mu.

Nanan-mâmi as Maria, sâgue' I famagu'on-mu.  
Astaki in fanmapo'lo gi echongñan I tronu-mu.  
Ya in tina i Saina-ta, as Jesús gi gina'chong-mu.  
Koru: In tina Sânta Maria, i mamapotge'ñaihon-mu.

---

### **TINAITAI GI FINE'NENA NA HA'ÂNI**

Sengasgas hao, Bithren Maria, sen nanan Yu'os, nu i mamapotge'ñaihon tai'isao. Bula grasia, inekte nu i tininas yan i fine'nana na tinai'isao. Sen masâmai yan taiche'tan na un miresi numanan Yu'os. Hâgu, asaina, gi mamapotge'ñaihon-mu, ayu i gósmanana na machakchak i hassuyon na ha'ânen i grâsia. Yan i ma tuna na sinhilo' i atdao i tininas, nu i dumudulalak i hinemhom i isao, ya chumo'chomma i anineng i finatai. Ya ha bababa i fanhakman i langet.

Manmamagof ham, asaina, nu i tinakhilo'-mu. In gegepte pâ'go na ha'âni. In tekukkune i sengasgas na mamapotge'ñaihon-mu. In sâsangan, na hâgu, sen masâmai yan tai'isao. Manmamagof ham, ya in titina lokkue' i man sensantos na mañaina-mu as Joaquin yan Ana. Ya in na'tatakhilo' i Sinantusan Trinidad, sa' sen nina gâtbo hao guihi na ha'âni. In gagagao hao, na nâna, nu i ginassas i anten-mami yan i minaolek i penngan-mami pa'go, yanggen ha' mañasaga ham gi tano' yan i finatai-mami. Taíguenao mohon.

### **TINAITAI GI MINA'DOS NA HA'ÂNI**

Sengasgas hao, Bithen Maria, rainan i anghet siha, na mamapotge'ñaihon ma'okte grasia yan mana takhilo'ña ki i serafin siha ya kalan gualâfon na pulan bula minaolek; na mana'ti hao nu i manana para un atan ha' si Yu'os yan i hinengge, ya guenao na grasia takhilo'-ña hao ki i manakhilo' na serafin siha, sa' kabâles-ña i hinengge-mu ki i hinenggen-ñiha; sa' achok ha' mamaigo' hao, makmâmata ha' i korason-mu.

Manmamagof ham, Asaina, nu i tinakhilo'-mu. In gegepte pa'go na ha'âni. In titina i taiche'tan na mamapotge'ñaihon-mu. Manmamagof ham; ya in titina lokkue' i man sen santos na mañaina-mu as Joaquin yan Ana. In na'tatakhilo' i Sinantusan Trinidad, sa' sen nina gâtbo hao guihi na ha'âni. In gagagao hao, na un hagu'i ham nu i fehmanan na hinengge nu i inatan si Yu'os guini gi tano', ya in li'e' gi langet. Taíguenao mohon.

### **TINAITAI GI MINA'TRES NA HA'ÂNI**

Sengasgas hao, Bithen Maria, rainan i patriatka siha, nu i mamapotge'ñaihon tai'isao, inadotna nu i bittot man nangga, nu i un tatanga nâya na u gaige ha' si Yu'os giya hâgu, na ginen ayu ha' annai un tutuhon hao huma'ani gagaige hao giya guiya pot grasia, ya sa' guaha giya hâgu enao na ninangga' un miresi na u guse' mâgi gi tano' yan i minetton i ginegue-mu nu hami.

Manmamagof ham, Asaina, nu i tinakhilo'-mu, in gegepte pa'go na ha'âni i mamapotge'ñaihon-mu. In sâsangan na hâgu sen gâtbo hao yan tai'isao.

Manmamagof ham, ya intitina lokkue' i sen santos na mañaina-mu as Joaquin yan Ana. In na'takhilo' i Sinantusan Trinidad, sa' sen nina'gátbo hao guihi na ha'áni. In gagagao hao, na nâna, ninangga, ya in angongokko i ilek-ña si Yu'os na u na'i ham, iyon-mâmi gi langet. Taíguenao mohon.

### **TINAITAI GI MINA'KUATRO NA HA'ÁNI**

Sengasgas hao, Bithen Maria, rainan i profeta siha, nu i mamapotge'ñaihon tai'isao, inadotna nu i manmaolek na pennga' siha, na linesgue hao nu I ginefli'en Yu'os na ayu ha' annai un tutuhon huma'áni, ha na'chilong i korason-mu yan i korason Yu'os, ya nina'ma'lakña hao ki yan mandanña i manserafin yan i mañantos gi langet.

Manmamagof ham, Asaina, nu i tinakhilo'-mu. In gegepte pa'go na ha'áni yan in tekukkune i taiche'tan na mamapotge'ñaihon-mu. In sasangan na hâgu sen gátbo hao yan tai'isao. Manmamagof ham ya intitina lokkue' i sen santos na mañaina-mu as Joaquin yan Ana. In na'tatakhilo' i Sinantusan Trinidad, sa' sen nina'gátbo hao guihi na ha'áni.

In gagagao hao, na nâna yan nanan i Yini'usan Ginefli'e' na un na'nina'yi i korason-mâmi nu ennao na ginefli'e', ya u fansinengge nu ennao na guafen lânget guini gi tano', u fanmañiñila' ha' gi langet gi manañhinekkok na ha'áni. Taíguenao mohon.

### **TINAITAI GI MINA'SINGKO NA HA'ÁNI**

Sengasgas hao, Bithen Maria, rainan i apostoles siha, nu i mamapotge'ñaihon tai'isao, in adotna nu todú i manmaolek na pennga' ya kololo'ña nu i tinemtom, ya un siña fuma'tinas i palu siha na bittot yan i dinanche na gine'hen i Santa Iklesia. In sasangan hao, Ásaina, na sen tomtom hao na Bithren gi mesterión Nanan Yu'os ha' yan i Santa Iglesia yan sainan todú siha i nina 'huyong Yu'os.

Manmamagof ham, Ásaina, nu i tinakhilo'-mu. In gegepte pa'go na ha'áni yan in tekukkune i taiche'tan na mamapotge'ñaihon-mu. In sasangan na hâgu sen gátbo hao yan tai'isao. Manmamagof ham ya intitina lokkue' i sen santos na mañaina-mu as Joaquin yan Ana. In na'tatakhilo' i Sinantusan Trinidad. ya in gagagao hao na un fâkkai ham nu i tinemtom, ya in na'tunas i pinekkat-mâmi taimanu i malago' Yu'os. Taíguenao mohon.

### **TINAITAI GI MINA'SAIS NA HA'ÁNI**

Sengasgas hao, Bithen Maria, ma'lak na rainan i manmattet siha, nu i mamapotge'ñaihon tai'isao, inadotna nu todú i manmaolek na pennga' na manggaga'chong ha' yan i tininas nu i muna' tunas yan muna'kabales i che'cho' siha annai lâlala' hao guini gi tano' na ha guaiya-ña si Yu'os ki todú i santos na hinanao i manunas,

Manmamagof ham, Ásaina, nu i tinakhilo'-mu. In gegepte pa'go na ha'áni yan in tekukkune i taiche'tan na mamapotge'ñaihon-mu. In sasangan na hâgu sen gátbo hao yan tai'isao. Manmamagof ham ya intitina lokkue' i sen santos na mañaina-mu as Joaquin yan Ana. In na'tatakhilo' i Sinantusan Trinidad, sa' sen nina'gátbo hao guihi na minagâhet hinengge. In gagagao hao, na nâna, na un na'hago' ham nu i tininas nu i u na'fanunas ham pa'go yan astaki manmâtai ham. Taíguenao mohon.

### **TINAITAI GI MINA'SIETE NA HA'ANI**

Sengasgas hao, Bithen Maria, rainan i konfesot siha, nu i mamapotge'ñaihon tai'isao yan gi minaolek i tinai'isao, in adotna nu todū i bittot siha yan dinidok nu i minatatnga ya un siña chumo'gue sen kabâles, un â'ñao siha i manganiti, ya un yamak i ilun i kulepbla nu i dumagi si Eba gi Para'iso, sa' ennao na takhilo' cho'cho' mina'hagas ha' in ayek hao as Yu'os.

Manmamagof ham, Ásaina, nu i tinakhilo'-mu. In gegepte pa'go na ha'ani yan in tekukkune i taiche'tan na mamapotge'ñaihon-mu. In sasangan na hâgu sen gâtbo hao yan tai'isao. Manmamagof ham ya intitina lokkue' i sen santos na mañaina-mu as Joaquin yan Ana. In na'tatakhilo' i Sinantusan Trinidad, sa' sen nina'gâtbo hao guihi na ha'ani.

In gagagao hao sengasgas na bithren na un fâkkai ham nu i minatatnganga-mu, ya in fa'tinas taiguihi i fina'tinas-mu; ya in â'ñao i acha'ot-mâmi siha yan i finatai-mâmi. Taíguennaohon.

### **TINAITAI GI MINA'OCHO NA HA'ANI**

Sengasgas hao, Bithen Maria, Rainan i Manbithen, nu i mamapotge'ñaihon tai'isao, inadotna nu todū siha i manmaolek na pennga' yan bittot na mana'fañetton gi sen masamai ni Binithen-mll, sa' un Nanan i linahyan i bithen siha na mansengasgas na asaguan i Bithen as Jesukristo i Lahi-mu na sen Santos; ya nindtagâhlo' lokkue' i bittot i Tenplansa.

Manmamagof ham, Ásaina, nu i tinakhilo'-mu. In gegepte pa'go na ha'ani yan in tekukkune i taiche'tan na mamapotge'ñaihon-mu. In sasangan na hâgu sen gâtbo hao yan tai'isao. Manmamagof ham ya intitina lokkue' i sen santos na mañaina-mu as Joaquin yan Ana. In na'tatakhilo' i Sinantusan Trinidad, sa' sen nina'gâtbo hao guihi na ha'ani.

Ya in gagagao hao na un fâkkai ham nu ennao na bittot, ya cha'-mâmi dumidiles i ma usan i sentidu siha gi tataotao, lao maolekña in sa'pet yan in chemma' siha taiguihi i fina'tinas-mu. Taíguennaohon.

### **TINAITAI GI MINA'NUEBI NA HA'ANI**

Sengasgas hao, Bithen Maria, rainan i mañantos, nu i mamapotge'ñaihon tai'isao, ya ma'okte-ña sinantos ki todū siha yan mandaña' ya man a'gef agofli'e' yan si Yu'os. Manâ'i nu i bittot i minesngon nu i sen tagâhlo' na bittot nina'en Yu'os, yan i mana'sasahnge ha' gi mamapotge'ñaihon -mu.

Manmamagof ham, Ásaina, nu i tinakhilo'-mu. In gegepte pa'go na ha'ani yan in tekukkune i taiche'tan na mamapotge'ñaihon-mu. In sasangan na hâgu sen gâtbo hao yan tai'isao. Manmamagof ham ya intitina lokkue' i sen santos na mañaina-mu as Joaquin yan Ana. In na'tatakhilo' i Sinantusan Trinidad, sa' sen nina'gâtbo hao guihi na ha'ani.

In gagagao hao na un na'fanmesngon ham ha' gi sen fehman na maguaiyan i tailamen na mamapotge'ñaihon -mu, ya ingepte hao gi langet. Taíguennaohon.